

Jo. Bugenhagen

Articul es

Wittenberg. 1530.


J i

3366

Sol zu Di 3366 of

Quintessenz, da U. B. Ex. 1111

Roa



Artickel der Doctorn von Louen / zu welchen / Wilhelm von Zwollen / Königs Christiernen Forirer / Christlich hat geantwort / Vnd daneben eine Christliche bekentnis gethan / dar auff er zu Meche len ym Niderlande verbrand ist. Anno M. D. xxx. des. xx. tags Octobris.

Mit einer Vorrede Johannis Bugenhagen Pomern.

Wittenberg.
1530.





22,4329.
(Austausch für 1913 & 1295)



Johannes Bugenhagen

Pomer/ allen Christen.



Aulus hat gerveiffaget
von denen die der warheit widderstreben /
vnd gesprochen . 2 Timo . 3. Es sind
menschen von zurrutten synnen / vntuch-
tig zum glauben / aber sie werdens nicht
aus furen . Denn yhre torheit wird offenbar werden
iderman / Solchs gerichte Gottes sehen wir teglich
vber die hesser vnd lesterer des heiligen Euangelij / das
ist / der gnaden Gottes / die vns ynn Christo gepredigt
vnd angeboten wird . Besondern aber mag iderman
itzt das selbe sehen an den Doctorn odder Theologen zu
Löwen / welche haben Artikel gestellet widder den
Christglaubigen Marterer Wilhelm von Zwollen / zu
Mechelen ym Vnderland verbrand / Wenn sie nicht so
grob verblindet weren / so wurden sie sich yhe schemen /
vnd nicht so offenbar yhre torheit fur iderman an den
tag geben .

Denn niemand ist so vnuerstendig / der nicht mer-
cket ynn yhren Artikeln / das sie gerne das liecht wol-
ten schewen / so sie konten / Darvnd stellen sie die sel-
ben artickel zum teile auch nicht / wie sie mit Gottes
wort itzt werden angefochten / sondern also / das sie
dennoch sollen einen guten schein haben / wens mög-
lich were . Sie verdecken mutwillig vnd wissentlich /
widder yhre gewissen / die warheit / vnd reden gleich ob
sie brey ynn maul haben / das man sie ynn yhrer lügen
nicht sol ergreifen . Wer eine böse sache hat / vnd wil
nicht ein frommer man sein / der mus sich also behelffen /
Aber es hilffet nicht / die Esels ohren kucken aus der
Lawenhaut / Ihre torheit wird offenbar iderman .

A ij

Vorzeit

Vorzeiten meineten wir / das diese leute alleine so
blind weren / darumb das sie ynn yhrer Sophisterey
vnd yhren Tradition erfossen sind / Jzt aber kompts
ans liecht / das sie die erkante warheit anfechten vnd
auffss hoheste verfolgen / Welches ist eine sunde ynn
den heiligen geist / wie sie selbs aus dem Augustino les
ren / vnd wollen also mit yhrem harten kopffe hindurch
widder Gott vnd seinen gesalbten / wie ym andern Psal
me geschrieben stehet / das wird yhn vbel bekommen / sie
mussen herunter / der zorn Gottes ist endlich vber sie ko
men wie Paulus von solchem Otter gezichte schreibet .
1. Tessa . 2 .

Las vns das liecht halten bey diese achte tunc
ckel artickel / das wir sehen wie gerne der teuffel wol
te schon sein.

Auffs Erste / Haben sie einen artickel gestellet von
Schweren / ob man schweren muge / wie auch die Theo
logen zu Colen solchen artickel fur gestellet hatten dem
Rudolpho / da selbs kurz verbrand . Ich weis nicht
was sie fur ursache zu solchem artickel haben / Ich sehe
aber wol / das Wilhelm ein antwort dazu gegeben hat /
an welchem yhe billich einem Christen genugen solte.

Zum andern / Sagen sie von statuten vnd gesezzen
des Papsts vnd der gemeinen kirchen / wie gerne het
ten sie gesagt / der Römischen kirchen / vnd durfften
nicht vnterscheid machen zwiffchen den Statuten / das
man sie yhe nicht fange ynn yhrer tollen blugheit .

Wir sagen aber also / Wenn sie anders keine sta
tute wissen zu machen / denn das sie viel erdichte Gots
tes dienste anrichten / die leute from zu machen / vnd le
ren odder predigen vnd dringen solchs auff der leute
gewissen / so sollen sie horen von Christo aus dem Esai
ia / wie geschrieben stehet Matthei . 15 . Ihr Gottes
dienst ist gar verloren / die weil sie leren solche lere / die
nichts

nichts denn menschen gepot sind. Ja man lese furt an
ym Esaia / wie Gott solche meistere vnd yhre schuler /
das ist die blinden vnd der blinden leiter / verstocken
vnd verblenden wil mit yhrer erdichten heiligkeit.

Was Gott befolhen hat (welchs ym glauben vnd
ynn der liebe begriffen ist) ist Gottes dienst vnd nichts
anders / Was aber widder Gottes gebot vnd wort /
vnd widder den Christlichen glauben wird gesetzt vnd
verordenet / das halte der teuffel / Widder den Christo-
lichen glauben sind alle Statute / Regulen / Obseruan-
tien vnd wercke / da durch man fur nimpt frey von sun-
den zu werden / vnd das ewige leben zu verdienen.
Denn solche ehre gehöret alleine Christo zu / Es ist bes-
schlossen / wie er sagt Johan. 14. Niemand kompt zum
Vater denn allein durch mich. Das ist auff dis mal
gung geredet von vnchristlichen Statuten / Tu wil ich
auch bescheid geben von Christlichen statuten.

Die diener der kirchen / das ist / der Christenheit /
die Gottes wort dem volck furtragen (was solten sie
sonst anders fur diener sein?) mugen wol vnd sollen gu-
te ordenung halten odder machen / das die leute / ehr-
lich vnd zuchtig zu samen komen / das Euangelion zu
hören vnd die Sacramente zu nemen / wie Christus be-
folhen hat / zu beten ynn der gemeine vnd Gott ynn
Christo zu loben / wie Christus sagt / Solches thut zu
meinem gedechnis / das alles zugehe ordentlich. Sie
mugen auch sonst vermanen / vnd ordenen was da
dienet sinde vnd ergernis zu vermeiden / wie die Apostel
theten Acto. 15. ynn yhrem Concilio.

Aber wie etliche stuecke / alleine nütze ein zeitlang /
werden angenommen ynn Gottes namen vnd gefallen
wol dem heiligen geist / so sol man sie auch widder fals-
len lassen ynn Gottes namen / wenn sie nicht mehr nütze
odder ergerlich sind / vnd nicht auff die gewissen drings
A iij en / Wie

en / Wie wir sehen das der gemeine man hat fallen la-
ffen / on alle Concilium odder Bischoffe / die ordenung
der Aposteln vom gözen opffer zu essen / von blut / vnd
vom erstickten / da solches nicht mehr ergerlich war /
Denn auch bey Paulus zeiten / der doch solche orde-
nung hinaus brachte / war es frey gözen opffer zu essen /
wens on ergernis geschehen konte / das ist offenbar aus
seinen Epistolen. Unser Concilia solten yhe ynn solchen
stücken nicht heiliger sein denn der Apostel Concilium /
so wir nicht lust hetten die gewissen zumerstricken / die
Christus mit seinem blut frey hat gemacht / Was aber
aus Gottes wort geordenet wird zu halten / das sol
ewig bleiben / nicht vmb menschlicher ordenung / son-
dern vmb Gottes worts willen / als da ist / das die Apo-
stel ym Concilio gebieten den bekerten Heiden / das sie
sich der hurerey enthalten sollen / welchs gebot Gottes /
vnsere Papisten ynn allen ehren halten / wie alle leute
iung vnd alt wol wissen.

Was wiltu mehr hören von Statuten vnd orde-
nungen? Solches ist yhe bescheidlich vnd nicht tuncfel
geredt von vnchristlichen vn Christlichen statuten / das
man nicht darff klagen / das wir alle Statuta verwerff-
en / Vnnutze Statuten können wir wol entberen / wol-
len sie aber vns da mit beschweren / wenn sie gewalt
vber vns haben / so wollen wir yhre tyranney leiden / so
ferne es nicht sey widder Gottes wort vnd den Christ-
lichen glauben (wie gesagt) das sie vns gebieten. Unser
gewissen aber sollen frey sein / das wir nichts da von hal-
ten / vnd wollen solches auch leren / das wir das vns
fern iunckern den Gesetz machen / vnd nicht Gott zu
willen vnd zu dienste halten / wir wollen auch mit der
zeit ein exempel nemen von yhn / vnd halten wie sie / sie
gebieten viel / vnd haltens selbs nicht / Ich wolte das
Herren vnd Fursten vnd andere Oberkeit / ein mal das
hin ges

hin gerieten / Das sie yhre pfaffen drungen zuhalten yhre ganze Papsts recht / welch ein elend volck solten sie werden / wie solten sie Lutherisch begeren zu sein / Es solte sie nicht mehr lusten / das vnschuldige blut der heiligen Marterer / wie dieser Wilhelm ist / auff sich vnd yhre Oberkeit zu laden.

Zum dritten / Vom Fegefeuer / da die seelen der verstorbenen ynne geplaget werden / wissen keinen Propheten odder Apostel / das ist / keine schrift des alten odder newes Testaments / Gott hat vns nicht da von befohlen / der Christliche glawbe weis nichts da von / Da sind auch noch keine Doctores gewesen / die solchs Fegefeuer aus der heiligen schrift beweiset haben / Etliche haben yhn wol solchs fur genommen / aber sie haben yhren vnuerstand da mit redlich beweiset / wie nu schier die kinder der ynn der schulen wol wissen / Da neben haben vns die Polter geiste vnd der pfaffen lügen das fegefeuer so auffgeblasen / das wir eitel Fegefeuers messen haben / zu dienst dem grossen Gott / der da Bauch heisset / vnd haben verlorn den seligen brauch des heiligen Sacraments / vns von Christo befolhen vnd von den Aposteln gelert / vnd von den frommen Christen gehalten / wie vns offentlich anzeigen Paulus .i. Cor. .ii. Die rechten Christen haben ynn diesem leben fegefeuers gnung / da von auch die schrift meldet / vnd heisset es / anfechtung / verfolgung / das feur des trubfals 2c / Dar von ein ander mal mehr / Die feinde der gnaden Gottes / durffen nicht sorgen / das sie kein feur behalten / wenn sie schon das fegefeuer verlieren . Sie haben dennoch ym vorrat das hellische feuer / da hinein gehören solche Christenschender vnd viri sanguinum / das ist / blut hunde vnd mörder / Wir wolten gerne mit vnsern gebete vnd lere / sie erretten / wenn sie nicht so mutwillig widder die erkante warheit tobeten .

Zum

Zum Vierden / Wir haben ym himel niemand an-
zuruffen / denn Gott vnsern Vater / vnd vnsern HERR
Ihesum Christum / vnsern Mittler vnd versöner vnd sel-
ligmacher / vnd den heiligen geist / der vns Christum le-
ret / vnd zu ewigem trost durch Christum / den Vater ers-
zeit. So leret vns alle schrift / Gott sey gelobet / Der
Christen glaube weis nicht anders / der teuffel sols nicht
anders beweisen / lügen gilt nichts. Wer ander götter
hat anzuruffen / der mag sich auff sie ym seinen nöteit
verlassen.

Zum Funfften / Ach Gott wie schewen sie das
liecht / wenn sie von beider gestalt des Sacraments re-
den sollen / nu die warheit des befelhs Christi am tage
ist. Christus gab den kelch seinen Jüngeren vnd sprach /
Trincket alle draus / dieser kelch ist das newe testament
ym meinem blut / das für euch ausgegossen wird / zur ver-
gebung der sunden / Solchs thut so oft yhrs trincket zu
meinem gedechtnis. Hie frage ich / Sind nicht die Leien
Christus discipuli / das ist / schuler die von yhm als von
yhrem einigen Meister / das Euangelion leren sollen ?
hören sie nicht zum newen testament / das ist / zur verge-
bung der sunden ? ist das blut Christi nicht yhr ? ist nicht
für sie ausgegossen zur vergebung yhrer sunden ? sollen
sie nicht des HERRN gedencen / das ist / verkündigen
vnd bekennen des HERRN tod / welcher wird vns
klerlich angezeigt ym der ausgiessung seines bluts /
Wenn hat Christus ym Sacrament zu empfangen ein un-
terscheid gemacht zwischen den Christen ? Wo haben
die Apostel anders geleret vom Sacrament / den Chris-
tus befolhen hat ? Die heiligen Bischoffe vnd die man-
nennet Doctores Ecclesiae / haben beide gestalt des Sa-
craments allen Christen gegeben / Die solches anders
sagen vnd schreiben / die thun den heiligen Doctoribus
gewalt vnd vnrecht / vnd sind grobe Esel vnd vnuer-
schamte lugener .

Sie sag

Sie sagen ynn diesem Artikel. Es ist nicht widder die einsetzung des **H E R R N** / noch widder das Euangeli- on vnd der Apostel gepot (**K** i **t** u **c** k / sie wissen nicht was sie sagen) das die Leien nur ein zeichen vom Sa- crament des altars empfaben / Wir aber sagen / Wenn Christus sagt seinen lieben Christen / die er mit seinem teuren blut erlöset hat / Nemet / trincket / das ist mein blut 2c. vnd ein ander kompt da her vnd verbent solchs den Christen / vnd saget / Bey verlust ewer seelen selig- keit / trincket nicht / yhr sollet Christum ynn dem parte nicht horen / er versuret euch / yhr seit verdampfte **K** e **z** e **r** / nicht alleine wenn yhr aus dem kelche trincket / wie Christus befihlet / sondern auch wenn yhr trincken wol- let / odder wenn yhr nur gleybet / das yhr aus des **H E R R N** kelche trincken muget / viel grosser **K** e **z** e **r** seit yhr noch / wenn yhr ander leu. e wollet leren / was Christus befolhen hat / yhr sollet nicht Christo vnd der Apostel lere gehorsam sein / sondern der kirchen / das ist / vns die wir verbieten was Christus befolhen / vnd die Apostel geleret / vñ die Christen angenommen vnd gebrau- cht haben / Was Christus befolhen hat das sol nichts sein / ia auch **K** e **z** e **r** e **y** / es were denn / das wir es widder zulieffen odder erlaubten / das Christus befelch krafft vnd macht solte haben / . Was wir aber wollen das sol recht sein / es sey Christo lieb odder leid 2c. Ist ein solch er mensche nicht ein lesterer Gottes / vnd ein mutwilliger schender des heilsamen befelchs vnser **H E R R N** Jhe- su Christi? Solche frome leute sind vnser pfaffen mit der verbietung des **H E R R N** kelchs / noch wollen sie Christen sein / ia sie durffen wol mörder daruber wer- den / wie sie diesen Wilhelm gemordet haben widder Gott / vnd wenn sie an etlichen orten keine gewalt ha- ben zu morden / so feilet es doch an yhrem guten willen nicht. Wer diese diebe bey solchen fruchten nicht mercken kan / der mus seer vnuerstendig sein. **B** **Z**um

Zum sechsten vnd siebenden / sagen wir / das sie des heiligen geistes vrteil widder sich geweiffaget haben . 1 Timo . 4 . da sticken inne bis an die ohren diese leute / die vom glauben abgetretten sind / vnd hangen an den irrigen geistern vnd teuflischen lere / die da predigen lugen ynn heucheley / das ist / vnter dem schein der heiligkeit / sie haben schendliche brandmale ynn yrem gewissen / widder die nature vnd widder Gottes wort . Was ist denn das sie so böse lere ? Sie verbieten den ehelichen stand vnd speise 2c . Ein Christē lese yhe fleissig das selbs / wie wir den text oft haben klerlich ausgelegt ynn vnsern buchern / so wird er sehen das der heilige geist vnser Pfaffen vnd Mönche gar fein getroffen hat / Solche Ketzer vom heiligen geist verdampft / sind yhe nicht die man die Lutherischen nennet / des haben wir gute gezeugnis von der ganzen welt / auch von vnsern feinden / wie diese beide Löuenschen artikel anzeigen .

Von den speisen sagen wir so . Man solte das volck lere / das sie nicht fressen vnd sauffen / wie die Apostel lere / vnd wie Christus vermanet Luce . 21 . Hutet euch das ewre hertzen nicht beschweret werden mit fressen vnd sauffen vnd mit der sorge dieses lebens 22 . Vnd da neben lassen die gewissen mit lere vnd gesetzen vnuerstricket / ob sie fisch odder fleisch essen sollen / denn solchs ist teuflische lere / da durch die gewissen vom glauben Christi werden gefuret / vnd lernen sich auff erdichte gerechtigkeit verlassen .

Von der keuscheit aber sagen wir also / Alle Christen sollen keuscheit halten / Niemand sol vnkeusch lebē / wer nicht kan keusch leben ausser dem ehelichen stande / der sol keusch leben ynn dem ehelichen stande . So wil es Gott haben / vnd so hat ers verordnet / Im ehelichen stande aber keusch leben / ist das ein yglicher sich benugen lesser an seinem ehelichen gemahl / wie auch

Sanctus

Sanctus Paphnutius saget ym concilio Niceno / vnd werete da mit / das das Concilium auff das mal nicht muste schuldig werden an den teuffels leren / die ehelich zu werden verbieten / Darnach ist gleich wol fort gegangen / denn der heilige geist konte nicht liegen / der solchs zuvor geweissagt hatte .

Unser Pfaffen reden also von der Keuscheit / wie dieser sibende Artikel anzeiget / gleich ob die eheliche leute die kinder zeugē / nicht Keusch sonder vnkeusch leben / vnd ist doch die vnkeuscheit allen leuten verboten / aber kinder zeugen ym ehelichen stande / ist Gottes ordnung / sein werck vnd segen / Ja wen schon keine kinder da von kommen / so ist doch ym ehelichen stande die eheliche pflicht Gottes ordnung / Gottes werck vnd Gottes recht / wie Paulus schreibt . 1 . Cor . 7 . Darumb gefellet Gotte solchs wol / vnd hat einen greuel an der vnordnung die dawidder ist / also ist die hurey / die ehebrecherey / die vnreinikeit vnd Sodomi / ym wilchen teuffels wercken sticken bis an die oren . Die meisten Pfaffen vnd Monche / die so kostliche Keuscheit fur geben mit yhren Artikeln / in hypocrisi loquentes mendacium / Die andern alle / die vnter yhn die reinsten wollen sein / sind ym den teuffels leren erflossen / vnd verteidingen die teuffeliche verbietunge des ehelichen standes / daraus solche schande vnd sunden komen / wie am tage / Der Jungeste tag wird schier mehr an tag bringen / der eyne bube ist wie der ander / one das diese teuffels lerer erger sind / denn die allein ym des teuffels wercke sticken / Denn arme sunder mag Gott bekennen / vnd aus barmhertzikeit durch Christum / wenn sie zum Euangelio kommen / bessern / Die aber die teuffels leren verfechten / sind ym yhrer heiligen lügen vnd heucheleie ganz verstockt vnd verblindet .

B ij

Sie

Sie alle vber einen hauffen / sind nicht werd / das
sie das heilige wortlein Keuscheit ynn mund nemen / sie
wissen nicht was es ist. Wer on hurerey / ehebrecherey /
vnrainigkeit zc. lebet / der lebet keusch / er sey iungfraw /
widwe odder ehelich / So wird man es finden ynn der
heiligen schrift / Der teuffel wolte gerne sagen / wenn er
durffte / das der ehliche stand vnkeuscheit sey / da mit
er mochte deste bas betrefstigen seine teuffelische ehe
verbietung. Darumb / darff kein Christen ewige Keuscheit
sonderlich geloben / alle leute sind schuldig ewige
Keuscheit zu halten aus Gottes gebotte / wie alle leute
schuldig sind Vater vnd muter zu ehren / nicht zu töd
ten / nicht morden / nicht stelen / vnd durffen solchs nicht
sonderlich globen / Wer aber aus vnwissenheit yhe gelo
bet hat ewige Keuscheit / dem ist da mit nicht verbotten
ein ehelich weib zu nemen vnd eheliche pflicht / kan er
nicht oder gefellet yhm nicht keusch zu leben anffer dem
ehelichen stande / so lebe er keusch ym ehelichen stande /
so bleibt er yhe noch ynn der Keuscheit / vnd vermeidet
vnkeuscheit / ynn welche er möchte fallen widder Gottes
gebot vnd widder sein gelubde.

Aber ich wil dir wol sagen was vnser geistlichen
geloben / wenn sie geloben yhre ewige Keuscheit / Sie ge
loben odder schwören nicht Keuscheit zu halten / denn
vmb Keuscheit willen zu halten durfften sie nicht den ehe
lichen stand vermeiden / sie leben auch nach yhrem ges
thanem gelubde vnd geschworat eide ynn aller vnkeu
scheit zc. vnd die fromesten vnte. yhn konmens anse
hen / das yhre mitpfaffen zehen huren. odder auch ehes
brecherinnen bey sich haben / odder sonst mit yhn zuhal
ten / das ist alleine eine menschliche bredlichkeit / das
aber einer von yhn hurerey / wie Paulus sagt / zu vermei
den / ein ehelich weib neme / nach Gottes ordnung vnd
willen / das ist / eine Kezerey nicht zu leiden / die man mit
feuer

fener mits straffen / vnd dar nach liegen das solche ewig
verdampft sein / das also der eheliche stand ynn die helle
höre / vnd Sodoma vnd Gomorra ynn den himel.

Was ist denne das sie geloben odder schweren?
Ich wils sagen / vnd sie sollens selbs bekennen müssen
mit aller welt / das ich nicht feile / Sie verloben vnd ver
schweren vnsers **HERRN** Gottes ehelichen stand /
Nemlich das sie nimehr ein ehelich weib wollen neh
men / solten sie auch ynn alle hurerey vnd unreinikeit
dar vber fallen vnd ewig zum teuffel faren. Ja es ges
chicht offft / das Gott yhr freuel geloben vnd schweren
straffet / da mit das er sie deste mehr unrein lesset wer
den / Sie solten des teuffels werck / vnd nicht Gottes
werck / als da ist der eheliche stand / verschweren / wie al
le Christen haben gethan vnd thun ynn der tauffe / Dar
aus mag man mercken wie feind die teuffels lerer sind
dem ehelichen stande / doch ynn Hypocrisi / das ist / vn
ter dem scheine der Engelischen heiligkeit / wie auch
Paulus saget Col. 2.

Summa / on weib reine leben / Konnen nicht alle
leute / sondern etliche den es Gott sonderlich gibt / wie
Christus sagt / Matthei. 19. vnd Paulus. 1. Corin. 7.
Dem es nicht gegeben ist / was gelobet doch der odder
schweret / zuhalten das er nicht kan? Mochtestu doch
auch wol geloben vnd schweren / das du woltest fliegen
vber den torm / vnd hast keine flugel. Ja sprichstu /
Ich wil Gott bitten vmb Keuscheit / Antwort / Das ist
wol von nöten / du hast ein weib odder nicht / Aber gelo
be vnd schwere nicht / du wirst meineidig. Ist dir aber
solche sonderliche gabe gegeben / das du on weib / odder
on man rein leben kanst / So gedencke das es eine gabe
Gottes sey / vnd gelobe odder schwere nicht / denn du
weissest nicht wie lange / Es möchte mit der zeit anders
mit dir werden / so hastu dennoch hinfurt den heiligen

B ij ehelichen

ehelichen stand / da zu du greiffen mugest / weil du mer-
kest / das du solcher muhe nicht mugest vberhaben sein /
Mühe hie mühe da / einen gnedigen Gott vnd gut ges-
wissen müssen wir habē / kan ich nicht vnehelich ynn den
himmel komen so kome ich hinein ehelich / wie geschrieben
steht Heb. 13. Ehrlich sey die hochzeit vnter allen / vnd
vnbefleckt die kamer / Die hurer aber vnd die ehebrecher
wird Gott richten odder verdammen. Ich schweige
hie / das auch einer der nicht benötigt ist / sonder hat
macht seines willens / das ist / dem Gott solche gabe gebē
hat / so er anders nicht vntuchtich zur ehe sey / muge ehe-
lich werden / wie Paulus sagt / er sündigt nicht. Der hei-
lige geist wil den ehelichen stand frey haben / widder alle
teuffels leren.

Aber reine leben / heisset nicht alleine auswendig
mit dem leibe odder fur den leuten reine odder keusch
leben / denn das were eine heucheley / sondern auch yn-
wendig one brunst vnd vnkeusche lust / wie Paulus sagt /
Das die Jungfraw keusch odder rein odder heilig sei
mit dem leibe vnd mit dem geiste. Das du nicht mit
dem hertzen ehebröchich odder unreine seist / Wie Chri-
stus leret / Vnd Paulus / weil solche ynn der farb der
vnkeuscheit sind / vnd können nicht mit freien hertzen
odder gewissen dem HERRN dienen / gibt rat aus
dem heiligen geiste / wider die teuffels leren vnd spricht /
Zu vermeiden die hurerey sol ein iglicher sein weib / vnd
eine ygliche yhren man haben / Denn es ist besser frey
en denn brennen / Wie auch Sanctus Cyprianus be-
schlos / do er ynne ward / das etliche Diaken / die Jung-
frawen (fuit) beschliessen / die ewige Juncfrawschafft
gelobet hatten (denn solche heiligkeit hub sich zeitlich
an / es waren aber keine kloster nonnen) vnd solche hei-
lige Diaken decketen doch den schalck / mit heiligem
scheine / vnd hiessen solche Juncfrawen / yhre geistliche
mutter

mutter / es waren alle gute geistliche leute / Solche heiligkeit bringet solche frucht. Wie denn etliche von vnsern Tunnichen / die Coronate / wilche sie nennen Carmiten / offft auch sind groblich angefochten von solchen heiligen leuten zc. Die wört Sancti Cypriani / wie er schreibt lib. 1. Ep. 1. sind diese. So solche Juncfrawen **Nicht wollen odder nicht können** bestendig bleiben / so istts besser das sie freyen / den das sie mit yhren lusten solten yns feur fallen / auff das sie mit solcher weise den brudern vnd schwestern / das ist / den Christen / keine ergernisse anrichten.

Das sind seine wort / wilche wir Christen nicht darumb sollen an nemen / das sie Cyprianus alleine hat gesagt / sondern darumb das sie Cyprianus hat gesagt aus Gottes wört / Denn seine wort stehen auffss erste auff den wörten Pauli / Es ist besser freien den brennen / Zum andern / dar auff / wie die ganze heilige schrift leret / das kein schandleben vnter den Christen / wie vnter vnsern geistlichen / sol sein . Solchen guten spruch aus Gottes wort / widder die teuffels lere / die vnter einem heiligen scheine der Jungfrawschafft vnd Keuscheit die ehe verbeut / findestu ynn des Pabst Decret nicht / damit man mochte viel elender gewissen trösten vnd Christlich erretten / sondern da sind lieber zusammen raffet solche spruche der Vcter / die sie vnfürsichtlich vnd on Gottes wort / ia offft widder Gottes wort gesagt haben / das damit vnser geistlichen / marter vnd stricke zurichteten den armen gewissen / vmb wilcher willen zu erfreyen Christus den tod hat gelitten . Was wiltu mehr hören von solcher Keuscheit?

Aber vnser Löuenschon Theologen setzen ynn diesem sibenden artikel da zu / Odder sonst ander gelubde Gott gelobet vnd gethan / sol man halten / Sie meinen

neten es zu treffen / das sie yhre Closter gelubde besteti-
geten mit einer Clausula generali / aber es hilfft nicht /
Man gelobet offte Gott / das nicht Gottlich ist / Man ge-
lobet auch offte Gott / vnd bezalet es dem teuffel.

Wie offte haben wir geschrieben / das ein recht ge-
lubde sol zweierley an sich haben . Das erste / das es sey
muglich / das ander / das es sey Gottlich / Was nicht mug-
lich ist / odder einem menschen nicht von Gott gegeben /
das gelobet vnd schweret ein narre / Was aber nicht
Gottlich ist / das ist / was widder Gottes wort ist vnd
den glauben / das gelobet ein gottloser vnd vnchristen /
es were denn / das ers thete aus vnwissenheit / dem sol es
leid sein / wenn ers lernet mercken / vnd sol Gott bitten
das er yhm solche vnwissenheit vergebe / vnd da neben
sein gottlose gelubde vnd eid mit fussen treten / Wer sich
zum teuffel hat gelobet vnd geschworen / solte er dar-
nach nicht begeren los zu werden : wie komen wir Chris-
ten zu solchen teuffels stricken : Vnmuglich ist zuhal-
ten / das du gelobest on ehe rein zubleiben / wenn dirs
nicht sonderlich gegeben ist von Got / wie gesagt / Vngot-
lich vnd vnchristlich ist / das die Moniche eine erlogene
armut geloben / vnd etliche wollen betteln / etliche setzen
sich ynn die guter / die sie mit yhren Segefeyrs messen der
welt abgelogen haben / so lange das sie auch Bischoffs
stebe vñ hute gebriegt haben / was wollē sie da mit mach-
en : Paulus durch den heiligen geist thut ynn den ban
solche vngeistliche mussiggenger vnd Bauch diener alle
samt . 2. Tessa . 3 . Bey vns sind sie die besten . Summa /
alle yhre regulen vnd obseruantien . Item / alles mensch-
liches furnemen / da durch sie wollen Abblas vnd verge-
bung der sunden erwerben / ist vnchristlich / vnd eine
verleugnung der barmherzigkeit Gottes vnd des bluts
vnsern I H X X V I Jhesu Christi .

Zum Achten / sie setzen einen articel also / Man sol
gehors

gehorsam seind den. Gebot der Kirchen vnd des Keisers /
das man Luthers bucher nicht lesen sol. Mit dem wort
te Kirche / da können sie mit spielen vnd schirm fechten
wie sie wollen / für den blinden. Kirche / welches auff
griechisch Ecclesia heisset / ist auff deudsch eine versam
melunge / Damit wir pflegen zunennen / die versamlunge
der Christen / Wennman sagte Ecclesia eine Christen
heit / so kondtens die deudschen besser verstehen. Eine
gemeine Christenheit / gehet vber die ganze welt / in
welche gehören / alle die an Christum gleuben / vnd Chri
stus lere lieb haben / welche auch wird genennet Apосто
lica / darumb das sie sich helt an die lere vnd an den glau
ben / welchen yhr Christus durch seine Apostel hat pre
digen lassen vnd befolhen. Alle Ecclesiae / das ist / alle
Christenheit odder Christliche versamlunge ynn son
derlichen ortern vnd landen / sollen alle gehören zu sol
chem glauben vnd lere / vnd nicht abgescheiden sein /
von der gemeinen Christenheit / wie gesagt. Apostel
glaub vnd lere sol allen Christen gemeine sein / anders
sind sie nicht Christē / wie wol sie sich so nennen / So solt
du verstehen das wortlein Kirche odder Christenheit.

tu wilich dir auch sagen was ynn des Luthers
buchern geschrieben stehet / das du mugest recht merck
en / ob das auch eine Ecclesia Christi / das ist / Eine
Christenheit sey / die solche bucher verbeut zu lesen. Lu
ther hat ynn seinen buchern geschrieben solche lere / als
ich ynn dieser vorrhede / widder diese acht Louensche
articfel geschrieben habe / welche lere er so beweret hat
mit Gottes wort vnd des Christlichen glaubens war
heit / das es vnser Sophisten / meine ich / wol gefulet ha
ben / sie können nu nicht mehr denn Gottes warheit
schenden / vnd das vnschuldige blut verdammen.

Über das so hat auch der Luther / wie wol schier
ynn allen seinen buchern / dauon geschrieben stehet / doch
C auch son

auch sonderliche bucher gemacht / von der gewalt vnd
ehre weltlicher Oberkeit / vnd also widder erfur gezo-
gen / das es auch mercken die Fursten vnd Herrn / die
sonst vnser feidde sind / Am der pfaffen bucher wirstu
solche treffliche vnd Gottliche lere vom gehorsam der
Oberkeit nicht finden / ia sie haben sie lieber etliche
hundertiar vntergehalten / gleich ob sie selbs die Ma-
iestet weren / leisteten keinen gehorsam / welches yhr
doch die Apostolische lere gebotten hat / gaben nicht
schos vnd ander pflicht / welches doch Christus selbs
dem Keiser odder oberkeit nicht versagt hat / vnd hat
vns gebotten / Gebet dem Keiser was dem Keiser / das
ist / der weltlichen Oberkeit / gehoret / was yhr aber
gehört / schreibt Paulus Ro. 13. Dar vber faren sie zu /
nu die Euangelische warheit so offenbar anslicht
kompt / vnd vber reden die weltliche Oberkeit / das sie
mus die warheit Gottes verbieten / gleich ob sie Turcken
weren / vnd waschen die hende ym vnschuldigen blute /
Ich meine / sie thun yhe der weltlichen Oberkeit grosse
ehre / wenn sie die so gewulich mit Gottes richte beschwe-
ren. Ich hoffe Herren vnd Fursten vnd ander Ober-
keit / werdens ein mal mercken / das helff ym Got
durch Jesum Christum vnsern lieben Herren Amen .
Da zu leret der Luther auch fleissig bitten fur Keiser
liche Maiestat vnd alle Oberkeit / vnd wir bitten auch
fleissig offenbar vom predigstule / vnd wenn wir gehen
zum Sacrament vnd ym vnsern offenbarn litanien /
wie am tage / so es anders yemand wissen wil / vnd wir
wissen das wir haben eynen Gott der vns erhoret
durch Christum vnsern Herrn / Der teuffel wolte gerne
durch die Pfaffen vnd Monche / die Oberkeit vber-
reden / das sie vns fur solchen dienst vnsern lohn gebe /
Das befehlen wir Gott / der sols sehen vnd richten.

Ja das heubtstucke / yn des Luthers lere vnd buch-
ern / habe ich noch nicht gesagt / Alle seine lere vnd

Schriſt iſt der grund aller heiligen ſchriſt / Articulus
Juſtificationis! das iſt / wie wir armen verlorn ſünder
ſollen vnſer ſunden lös / from vnd ſelig werden / Näm
lich / das wir von vns ſelbs verlorn ſind / vnd können
vns ſelbs nicht helfen / noch keine creatur ym himel od
der auff erden / vnd werdē der wegen nicht aus vnſern
verdienſte od der vermugen / ſondern aus lauter gnade
vnd barmherzigkeit Gottes vnſers lieben vaters / vmb
des bluts vnd verdienſtes willen ſeines lieben ſons vn
ſers **HERREN** Jeſu Chriſti / gerechtfertiget / das iſt /
gelöſet von vnſern ſunden vnd ewig ſelig / das wir hin
furt kinder Gottes ſein / mit dem heiligen geiſt begabet
vnd thun vnſers vaters willen . Solche artikel vnd lere
iſt der welt nicht zu leiden / ſolchs (wie Paulus aus dem
Eſaia ſagt . 1. Cor . 2 .) hat kein auge geſehen / kein ohre
gehoret / vnd iſt ym keines menschen hertz geſtigen /
one dem es der geiſt Gottes durch die predigt des Evan
gelij offenbaret / Vnſer Papisten kennen Gottes gerech
tigkeit nicht yn Chriſto / wiſſen anders nicht denn von
menschlicher gerechtigkeit / die zur ſelickheit für Gott
nichts gilt / zu plappern / nicht viel better denn Turcken
vnd Jüden / one das ſie alleine Chriſto den namen vnd
titel laſſen / das er ſei vnſer gerechtigkeit / das verſte
hen ſie nicht .

Was iſt nu ym des Luthers buchern / das man
nicht leſen ſol : od der was iſt das für eine kirche
od der Chriſtenheit die ſoche lere verbeut zu leſen? Wir
wollen Keiſerlicher Maiestet vnd aller Oberkeit thun
alles was ihr gehoret / vnd ſol niemand beweifen das
wir ungehorsam ſein / ſo man wollerecht ſagen / das wir
aber auch Gotte thun was yhm gehoret / das ſol vns
die Oberkeit die von Gott verordenet iſt / zu gute hal
ten / Denn Chriſtus hat vns beiderlei befohlen / Gebet
dem Keiſer was dem Keiſer gehoret / vnd Gott was
Gott gehoret

Mich wundert / das die Louenſchen Sophiſten in iren
articeln nicht ein wort geſetzt habē / de iuſtificatione wie

C ij man

man from obder der sünden los werde / das man für
Gott ein gut gewissen habe / Ich meine / sie seien nicht
gros darumb bekümmert / sondern alleine plappern von
Statuten / Segefeuers messen / heiligen anruffen / einer
gestalt / eier vnd butter / vnd yhrer heiligen Keuscheit .
Wer Gottes gnade ynn Christo erkennet hat / der kan
sich gar leichtlich ynn solchen stucken entrichten / Wie
aber solten sie sich darumb bekümmern / weil sie die
barmhertzigkeit Gottes vnd das blut vnsers **HERRN**
Ihesu Christi schenden mit yhrer lere / auff's hoheste /
vnd morden die solche gnade bekennen :

Ich halte auch das sie sich schemen von dem ar-
tikel mehr zusagen / weil es an tag komen ist / wie schend-
lich sie darmit widder alle schrift vnd den Christen glau-
ben geredt vnd geschrieben haben / Die geleertisten
vnter yhnen / pflegen zu schreiben vnd leren / das
mans solte verstehen / von den wercken der Judischen
Ceremonien / wenn Paulus so oft leret / das kein men-
sch from werde durch die wercke des gesetzes / vnd folge
ten so nach / etlichen lerern / die nicht wusten den rechten
grund des Christlichen glaubens / wie wol sie grosse
namen haben / Welche Augustinus mit klarer schrift
straffet vnd nidder leget / De spiritu et litera. c. 13. et
. 14. Solches konnen vnser blinden nicht sehen / den
es gefelt yhn nicht. Vnter yhn sind auch rechte
Grauianen entstanden / die meineten / es were sei
ne grosse ketzerey / das man saget / Sola fides iustificat /
das Sola / solte yhe nicht da bey stehen / vnd Paulus le-
ret doch nicht anders / der heilige geist gibt auch anders
keinen glauben / denn der vns alleine from machet ynn
Christo / wollen sie die leute darumb für ketzer schelten /
so schelten sie auch Sanctum Ambrosium / der offte
Doch

schreibt das der glaube alleine from machet / ynn com-
mentarijs in Paulum c. 3. et. 4. 2c.

Doch las sie faren / sie sind blind vnd blinden lei-
ter / man weis wol wie es solchen pflegt zu gehen / Es
ist grenlich an zu sehen / das etliche durch Gottes ges-
richte so verblendet sind / Seer trostlich aber / das wir
aus solcher blindheit errettet sind / vnd das der
heilige geist noch ynn diesen letzten verma-
ledieten zeiten / etliche Marterer ster-

cket / das sie vmb der warheit Chris-

ti willen / durffen den tod leis-

den / wie dieser Wilhelm

von Zwollen. Des

sey Gott gelobt

ynn ewigkeit

durch Jhe-

sum Chri-

stum

vnsern

HERREN
AMEN

C iij Artikel

Artickel Der Doctorn von Löwen.

Nach dem wir gesehen
haben die acta vnd antwort vns ge-
stern gethan von Wilhelm von zwol-
len / So haben wir geordenet / das
diese stücke so hernach volgen gehal-
ten / geglaubet / vnd bekennet sollen
werden / durch den vorgeannten Wil-
helm / so er für einen rechten Christen
man wil gehalten sein.

1 Zum ersten / Wo ymand ersucht wird zuschwe-
ren / ynn sachen die gerechtigkeit belangen odder
den glauben / so der selbe schweret / so thut er nicht wid-
der das wort gottes odder die heilige schrift.

2 Item das man sagt / das der Babst vnd gemeine
Kirche macht haben geseze odder statuten zu machen /
zum regiment / dem Christen volck / vnd das dem selbigen
das volck gehorsam sein solle / ist nicht widder die hei-
lige schrift.

3 Item das man saget / das segefener sey durch
menschen treume erfunden / das ist widder die selige
leer der gemeynen kirchen / vnd der heyligen / die vber
eyn kommen mit der heiligen schrift.

4 So sol man auch sagen von der anruffunge der
heiligen die mit Christo leben / Denn die sie anruffen /
thun nicht widder die heilige schrift.

5 Item es ist nicht widder die einsetzung des Herrn /
noch widder das Euangelion vnd der Apostel gebot /
das die leien nur ein zeychen vom Sacrament des
altars entpfahen.

6 Item / das man so viel tage der abstinenz von ey-
ren

ren/buttern auffsetzt/als ynn der fasten/vnd von fleisch/
als auff der Apostel abend vnd andere tage von der hei-
ligen kirchen eingesetzt / das ist nicht widder die heilige
schriff.

7 Item/Keuscheit ewiglich gelobet/ odder widwe zu
bleiben / odder sunst andere gelubde Gott gelobet vnd
gethan / soll man halten / So gebent vns die heilige
schriff.

8 Item/man sol gehorsam sein dem gebot der kir-
chen vnd des Keisers / das man Luthers bucher nicht
lesen soll.

Hierauff verleihen wir dem Wilhelm/zeit von xij.
tagen/darauff zu antworten / vnd darein zu bewilligen/
odder wir sollen mit yhm fort faren/ wie recht ist.

Dis sind die artikel auff's kurtzte
begriffen / wilche ich Wilhelm von zwollen denen von
Louan/fürnemlich meinem herrn dem Dehent gesandt
habe / vnd ynn die lenge verkleret mit der heyligen
schriff darauff gefurt/wo bey ich gedencf zu leben vnd
zu sterben/Vnd habe sie gesand dem obersten general
procurator.

Zum ersten das cinem Christen nicht geburt zu schwe-
ren/Matt. 5. den also Christlich zu schweren/als Paulus
thet Rom. 1. Testis est mihi deus 2c. mag ein Christen
wol thun/Vnd ynn sachen die gerechticheit belangen /
wenn ich da zu gezwungen wurde odder vermant von
der oberkeit die warheit zu sagen /was Got odder meis-
nen eben Christen angeht / Also schweret die oberkeit
den vnterthanen / vnd die vnterthanen den Herrn 2c.
Denn was vns selbst angehet /sollen vnser wortt Ja Ja
sein / Neyn Neyn/nachder lere Christi Matt. 5. Vnd
die warheit frey aussagen.

Der ander Artikel von dem Babst / Also lan-
ge

ge er das schwert nicht niderlegt / vnd ist vnterthan dem
Keiser vnd Königen / mit dem eusserlichen menschen / vnd
nimpt an das schwert des geists / wilchs ist das wort
Gottes. Ephe. 6 / so sol er vber meyne conscienz odder
gewissen / widder zu binden noch zu entbinden kein ge-
walt haben / denn Christus spricht Math. 12. Wer nicht
mit mir ist / der ist widder mich. Also kan kein Chris-
ten mensch dem Antichrist mit dem ynwendigen men-
schen vnterthenig seyn.

Auch bekenne ich / das der Babst / Bischoffe odder
Pfarrer macht haben zu Ordinirn aus Gottis wort
eine Christliche ordination / vnd die gliedmas der heys-
ligen Christlichen Kirchen schuldig sind die selben
zu halten / So die selbigen mit der lere Christi odder der
Aposteln vnd Euangelisten vber ein kompt / vnd der sel-
ben nicht entgegen ist. Vnd diese / Bepste / odder Bischo-
ffe / Pfarrer / sind kein heupt / Herren odder Brcutgam
der Christliche gliedmasse oder Gemeine / Sondern freye
diener / vnterhalter / furweser / auffseher odder hirs-
ten ct. Vnd diese Christenheit / gliedmasse odder Kir-
che ist nicht alleyn vnter dem Babst odder Römischen
Kirchen / sondern ynn der ganzen welt / gleych wie die
Propheten verkündigt haben / das das Euangelion
Christi solte in alle welt komen / Psal. 2. vnd. 18. das also
vnter dem Babst / Turcken / Persen ct. allenthalben die
Christenheit leiblich zurstrewet ist / aber geistlich ist sie
versamlet ynn ein Euangelion / eynen Glauben / vnter
eyn heupt / wilchs ist Christus Jesus.

In dieser Christenheit vberall wo sie ist /
da ist vergebung der sunde / vnd der rechte Ab'as /
Denn alda ist das Euangelion / die Tauffe / das
Sacrament des Altars / In welchen die vergebung
der sunden wird angeboten / geholt vnd entpfangen /
vnd Christus vnd sein geyst / vnd Got ist auch alda / vnd
ausser

ausser dieser Christenheit ist keine seligkeit noch vergebung
der sünden / Vnd ynn diesem geistlichen dienst odder
ordnung / hat ein Bischoff / Pastor odder ander geis-
tlich gliedmas / der den Heiligen Geist hat / vnd von
den gliedmassen der Heiligen Christlichen Kirchen
verordnet (ob er gleich keine platten hat / noch mit der
auswendigen salbe bestrichen ist) so grosse macht als der
Papist zu weiden / Teuffen / das Sacrament auszutei-
len vnd brechen / 2c / nach dem wir alle haben nur einen
Gott / einen Christum / einen Geist / ein wort 2c. dadurch
das alles geschehen mus / vnd des Papsts Gott nicht
größer ist denn vnser Gott / wilcher durch vns so wol
wircket als durch yhn / Denn das sein glaube stercker yn
Gott sein kan / denn meiner odder eins andern / mag wol
sein / odder ein größer gabe von Gott durch den heili-
gen geist empfangen hat / Des gleichen mag ein armer
mensch / der fur der kirchen sitzt / viel grössern glauben
haben denn der Papst / vñ mehr gaben von Got durch
den heyligen geist empfangen .

Der Dritte artickel von dem fegefewer / was
Paulus dar mit meinet. 1. Cor. 3. das mein ich auch /
vnd nicht weiter .

Aber das ich den Doctorn habe zugelassen vmb
hartikeit willen yhrer hertzen / das do solt ein fege-
feuer sein / darauff wilich mich nicht lassen tödten /
Denn ein recht gleubig mensch ynn dem glauben ster-
bende / weis das er selig ist / vnd der nicht gleubt /
verdampft / Also / das den verscheidenen seelen / Seel-
messen / Vigilien / Targezeiten 2c. nicht zu hulffe od-
der zu schaden komen / Sonder wir die wir ym leben
sind / vnd den selben worten Gottes gleuben / die vns
ynn der Messe odder sonst verkündigt werden auff dem
predigt stuell / werden da durch selig / Denn vns kein
ander namen geben ist / da durch wir mugen selig wer-
den

D

den

den / denn der name Jesu . Acto. 4. vnd kein ander weg
gerecht zu werden / denn durch den glauben an Christo
stum Jesum / Roma . 3.

Der vierde artickel / Ob die heiligen die ge
storben sind ynn dem Herrn / einige macht haben / fur
vns zu bitten / Halt ich mich allein an den einigen fur
bitter Jesum Christum / nach dem das vns die schrift
gar nicht vermanet von denen / die gestorben sind
ynn dem Herren / das wir sie anruffen odder das sie fur
vns bitten solten / on allein von den lebendigen hei
ligen / die auff dieser erden /

Der funfft Artikel / Von dem hochwirdigen
Sacrament / halt ichs wie Christus dasselbige seinen
Jungern gab zu seinem Testament / als Mattheus /
Marcus / vnd Lucas vns beschreiben .

Auffs kurzte / glaube ich / das die Messe nicht an
ders ist / denn ein Testament / gedechtnis / odder danck
sagung / odder wil mans so nennen / mag man es auch
halten fur eine representacio / nur kein werck / Opffer od
der gnugthuunge fur die vorstorbene menschen odder
seelen / die aus dem leychnam sind verschieden / Et
sic pro iustificatione anime sufficit sola effusio sanguinis
Christi.

Aber das man vns die eine gestalt davon
nimpt / nemlich das blut vnsers Herren / vnd vns
das nicht geben wil / ist wider die einsetzung Christi /
Ja auch widder des Papsts eigene geistlich recht /
Auffs erste Gelasij des Babst / de Consecratione dis
tinctione . 2 . Capi . Comperimus . Item yn der selbigen
distinction Capi . Quid sit / Der Papst Gregorius / Item
ynn dem selbigen capitel / A quibusdam . ct . vnd abermal
ynn der selben distinction Capit . Si non . Sagt S .
Hilarius / Wenn yemand nicht so grosse sunde gethan
hette ct . Also mag man sehen / wie vnfinnig dise falschen
Papisten

Papisten vnd Tyrannen sind / Das sie nicht allein wid
der Gottes wort / sondern auch widder yhr eigē geistlich
recht streben / Wilches sie gemeiniglich / grosser achten
denn Gottes wort.

Der sechste artickel / von der Beicht / Halt ich auff
erste / als David beichte fur Gott seynem Herrn / wil
che ein Christe alle tage schuldig ist zu thun Zum an
dern wie wir haben Matthei . 5 . vnd die sollen wir
thun so offte als wir vnsern nechsten Christen erzornet
haben . Zum dritten mal / das wir sollen gehen zu
einem verstendigen man / von Gott erleuchtet vnd
von der heiligen Christlichen kirche geordenet / vnd
yhm vnser not klagen / damit wir ym gewissen be
schwert sind / Vnd empfangen von yhm das wort der
absolucion (welchs Christus seinen lieben Aposteln be
fahl) zu vergebung der sunden / Vnd diese beichte ist al
len Christen frei hyn geben on allen zwang odder pena
einer tod sunde / On allein wenn er sich selbs beschwert
fulet / mag er dazu gehen .

Der Siebende artickel / von fleisch zu essen / ist allen
Christglaubigen frey gelassen / auff was tage / zeyt / stun
de / wenn einer das thut mit danck sagunge dem hymli
schen vater / hute sich doch das er damit niemand er
gere / Aber den vnglaubigen ist nichts vberall rein / denn
yhr gewissen ist beschmeist / Aber etliche tage zu enthal
ten eingesetzt von der heiligen kirchen / vmb etlicher
vnordigen vnd rauchlosen menschen willen / zu ein
er eusserlichen vbung / damit sie das fleisch ym zawn
halten / las ich wol zu das nicht widder die heilige
schrift ist / Aber einem Christglaubigen der den willen
seins vaters weys / vnd der sich teglich messig hellt /
D ij ist ein

ist ein tag als der ander. Iffet er fleisch odder
butter/so issset er dem Herrn / Lest ers/ so thut ers dem
Herrn/nach der lere Pauli/ Keinen tag ausgenommen/on
ergernis. Et sic omni tempore licitum est vesci carnibus /
Aber so keiserliche Maiestat / ynn plötzlicher anligender
not vnd angst/wie der König zu Cliniae that / ein gebot
vber sein vnterthan aus liesse gehen/ein tag zweien oder
drey zu fastē/Es were der sonntag/dinstag/freitag odder
sonabend / Das einer den andern auswendig mit solcher
weise ermanete zur ynwendigen buße/vnd zum ernstli-
chen anruffen Göttlicher barmherzigkeit / vnd etliche
liessen solchs fasten anstehen aus verachtung keiserlich-
er Maiestet vnd solcher not/darff ich sagen/das sie Got
den Herrn damit erzörneten.

Der achte artikel von den gelübden der Mönch-
en vnd Nonnen / Sinzermal ich nicht ynn der heiligen
schriffte finden kan/das der stand von Gote eingesetzt ist/
sondern allein aus menschen gesetz on Gottes wort oder
befelh gestiftet/mag ein yglicher eraus gehen wie er wil/
vnd sage das es ein vngöttlicher stand ist / weil sie das
durch meinen selig zu werden.

Der neunde artikel/das ich Martinus bücher ge-
lesen habe/hab ich nicht gethan/das ich keiserlicher Ma-
iestat gepot dadurch verachte/sondern allein darumb/
das ich müge sehen was gut oder böß sey/vñ was wider
Gottes wort sey/als menschen lere vnd treume/das ich
die selben verwerffen müge/Also heff ich/wird mirs Ro-
m.wol zu gutte halten.

Von den sayungen der kirchen / wird hie mit ynn
dem glauben begrieffen/welchen ich hie bekennen wil/
vnd damit der heiligen Drinaltigkeit mich beuohlen ha-
ben.

Bekentnis

Bekentnis des Christlichen glaubens.



Vffs erste / gleube ich von ganzem
herzen den hohen artikel der götli-
chen Maieſtet / das der Vater / der
Son / der Heilige Geist / drey vnter-
schiedliche personen / ein rechter / eini-
ger / natürlicher / warhafftiger Gott
ist / Schepffer hymels vnd der erden /
aller dinge vnd creaturn / gleich wie
das alles noch beide ynn der Römis-
schen kirchen / vnd ynn aller welt bey den Christlichen
Gemeinen gehalten wird.

Zum andern / gleube ich vnd weis / das die schrift
vns leret / das die mittelste person ynn der gottheit / nem-
lich der Son allein / ist warhafftig mensch worden / von
dem heiligen Geist / on mannes zuthun empfangen / vnd
von der reinen heiligen magd Maria / als von rechter /
natürlicher mutter geboren / als vns S. Lucas klerlich
beschreibt / vnd die Propheten verkündigt haben / Also /
das nicht der vater / noch der heilige Geist ist mensch
wordē. Auch das Got der Son / nicht allein leib on seele /
sondern auch die seele / das ist eine ganze volkomene
menschheit angenommen hat / der rechte same odder kind
Abraham vnd David verheissen / vnd ein natürlicher
son Marie geboren ist / ynn aller masse vnd gestalt / ein
rechter mensch wie wir / on das er one sünde / allein von
der iungfrawen durch den heiligen geist komen ist / Vnd
das dieser mensch warhafftiger Gott ist / ein ewige / vns
geteilte person / aus Gott vnd mensch worden / Also / das
Maria die heilige iungfraw / ist ein rechte warhafftige
D iij mutter

mitter/nicht allein des menschen Christi/sondern auch
des sons Gottes/als der Engel Luc.2. spricht/Das ynn
dir geboren wird / sol Gottes son heissen / Dis ist mein
vnd vnser aller Herr / Ihesus Christus/Gottes vnd Ma
rie einiger / rechter natürlicher Son / warhafftig Gott
vnd mensch. Auch glaube ich/das dieser Gottes vnd
Marien son/vnser Herr Ihesus Christus/für vns arme
sunder gelitten hat / gecreuziget / gestorben vnd be
graben ist/damit er vns von sunden / tod vnd ewigem
zorn Gottes/durch sein vnschuldig blut erlöset hat / Vñ
das er am dritten tage ist auffstanden von dem to
de/vnd auffgefahren gen hymel / vnd sitzet zur rechten
hand Gottes des almechtigen vaters/ein Herr vber alle
herrn/ein König vber alle Könige / vnd vber alle crea
turn/yn hymel/erdē/vnd vnter der erden/vber tod vnd
leben/vber sünde vnd gerechtigkeit.

Zum dritten/glaube ich an den heiligen Geist / der
mit dem Vater vnd Son ein warhafftiger Gott ist/vnd
vom Vater vñ Sone ewiglich kömpt/vñ doch ein vnter
schiedliche person/ynn einem göttlichen wesen vnd na
tur/Durch den selbigen werden alle gleubigen/mit dem
glauben vnd andern geistlichen gaben gezieret / als mit
einer lebendigen/ewigen/göttlichen gabe vnd geschencf
Von dem todt aufferweckt/von sunden gefreyet / frö
lich vnd getrost/frey vnd sicher ym gewissen gemacht.
Denn das ist vnser trost/das wir solchs Geists gezeug
nis ynn vnserm hertzen fulen/das Gott wil vnser Vater
sein/die sünde vergeben/vnd das ewige leben vns vmb
sonst schencken vnd geben.

Darnach glaube ich/das nur eine Christliche kirche
ist auff erden/das ist die Gemeine odder versamlunge
aller Christen ynn aller welt / die einige braut Christi/
vnd

vnd sein geistlicher leib / vber welche er auch das einige
heubt ist. Vnd die Bischoue odder Pfarrer der Gemei-
ne sind yhre diener vnd auffseher / vnterhalter odder fur-
wesser / Vnd die selbige Christenheit ist nicht allein vnter
der Römische kirche odder vnter dem Papst / sondern
ynn aller welt / wie die Propheten verkündigt haben /
das das Euangelion Christi solt ynn alle welt komen
Psalm. 2. vnd. 18. Das also die Christenheit ynn der Röm-
mischen kirchen vnd allenthalben leiblich zustrewet ist /
aber geistlich ist sie versamlet ynn einem Euangelio vnd
glauben / vnter einem heubt / wilchs ist Ihesus Christus.
Ynn dieser Christenheit / wo sie auch ist / da ist vergebung
der sunden / das ist / ein Königreich der gnaden / vnd des
rechten Ablass / Denn daselbs ist das Euangelion / die
Taufe / das Sacrament des Altars / ynn welchen die
vergebunge der sunden / wird angeboten / geholet vnd
entpfangen / vnd Christus vnd sein geist vnd Gott / ist
auch alda. Vnd ausser dieser Christenheit / ist keine seligs-
keit noch vergebung der sunden / sondern der ewige tod
vnd verdammis .

Zum letzten / gleube ich die auferstehung aller tod-
ten / am iüngsten tage / beide der gerechten vnd vngerech-
ten / das ein iglicher als denn empfaben sol / gleich wie er
gethan hat / Vnd also sollen die gerechten ewiglich leben
mit Christo / vnd die vngerechten ewiglich sterben mit
dem Teuffel vnd seinen Engeln. Also gleube ich an meis-
nen Herren / wie alle rechtschaffene Christen / Denn als
so leret vns die heilige schrift / Darinn stercke vns Gott /
vnd vnser Herr Ihesus Christus gebenedeiet ynn ewig-
keit / Amen.

Summa / ich gleube auffss kürzte an Got den vater /
Son vnd Heiligen geist / das ist / ich erkenne vnd neme
vergebung meiner sunde / die ewige frömkheit vnd seligs-
keit als

Zeit allein von Gott dem vater / schepffer hynels vnd
der erden / Alleine durch Gott den Son / Ihesum Chris-
stum / allein ynn Gotte dem heiligen geist meinem eini-
gen tröster / Vnd versage ynn diesem allein / was Gott
nicht selbs ist vnd thut / vnd halte anders nichts von nö-
ten odder nütze zu meiner seligkeit / Doch werden hie
mit nicht nidder gelegt die wercke / als solten sie nicht
von den Christgleubigen gethan werden / die da eusser-
lich geschehen aus dem glauben / durch die liebe / an vn-
sern nehisten / Welche vns von Christo befolhen sind /
Des gleichen auch die Tauffe / Sacrament empfaben /
predigt hören zc. werden da durch nicht verachtet vnd
verworffen.

Dis ist die Beichte fur Gott / vnd
eine offenbar beichte / Welche ich bekenne fur Gott vnd
der ganzen welt / nach dem befelch Christi / On welche
beichte mügen wir nicht selig werden / Zum ersten fur
Gott / vnd fur vnsern nehisten (so fern wir das thun kon-
nen) die wir erzurnt haben.

So bit ich auff's erste alle Christliche gliedmas-
der heiligen Christlichen kirchen / die ienigen die ich mö-
cht erzurnt haben von kind auff / da ich gewust habe /
was sünde ist gewesen / bis auff diese meine letzten stun-
de / das sie mir das vmb Gottes willen (ob ich yemand
anders gethan habe / denn ich wolt das mir geschehen
solt) durch Christum seinen gebenedeyten son wolten
vergeben. Hierauff bekenne ich / das ich habe gesündigt
fur Gott meinem schepffer / von der ersten stunde / da ich
wuste was sünde were / bis auff diese meine letzte stunde /
bis ich meine seele werde auff geben ynn seine göttliche
hende / das die aller geringste sünde die ich gethan ha-
be / würdig were ynn dem feuer hie auff dieser erde zu
brennen / vnd hernach mals ynn dem ewigen feuer / Aber
das staa

Das statet seine göttliche güte nicht / durch Christum seinen gebenedeiten son / der mich erlost hat durch sein theuer kostparlich blut / von sünde / Teuffel / tod / vnd helle / Also das ich erlost vnd erledigt bin / von dem hellischen hunde vnd schlangen / das er keine krafft noch macht mehr an mir hat. Vnd er wird ansehen das reuige vnd demütige hertze seins armen / vnwürdigen dieners vnd knechts / welchen er gedemütiget hat durch sein göttlich grundlose barmhertzigkeit / Also das er meine sünd vnd missethat / nymmer mehr wird gedenccken / Vnd keine ander Absolution / als nötige zur seligkeit / von dem auswendigen menschen beger ich zu empfaben / Psal. 31. Beati quorum remisse sunt iniquitates / et quorum tecta sunt peccata. Beatus vir cui non imputauit dominus peccatum &c. Vnd auch so oft als der mensch suffret fur seine sünde / wil sie Gott nymmer mehr gedenccken / Vnd alle die ienige die beschwert vn beladen sind / spricht Christus / Kompt zu mir / ich wil euch erquickten / dar auff wil ichs künlich wagen / Aber nicht yn verachtangestellen die auctoritet / seiner lieben Aposteln vnd Euangelisten &c. Jo. 20. Accipite spiritum sanctum / quorum remiseritis peccata &c. vnd Mat. 18. Quodcunque ligaueris &c. Hie mit befelh ich meinem hymnischen vater meinen geist ynn seine göttliche hand.

Ein lied von dem selbigen Wilhelm gemacht vor seinem tode / auff die weise. Tu frewt euch lieben Christen gemein.



O manich heubt so mannich syn / Er ist mir wol gefallen / Fur yhn kôr ich kein Keiserin / er liebt mir vber alle / Vnn meinem synn / der breudgam mein / den ich von grunde

¶

grund meins hertzen mein / Nach yhm steht mein ver-
langen.

Er hat mein hertz ynn seiner gewalt / er hat mein
synn gefangen. Nicht besser war mein mut gestalt / die
welt wil mit mir prangen / Mein lieb ist mein / vnd ich
bin sein / ich bin erfreut / durch sein anschein / Er legt mein
hertz zu raste.

All mein zuflucht setz ich zu Gott / bey yhm so wil
ich bleiben / Gewalt der welt vnd yhr gebott / sol mich
von yhm nicht treyben / Von yhm mich niemant reißen
sol / widder Teuffel noch sein glieder all / die welt wird
mit mir narren.

Was ligt mir an der werlet spot / ich acht sein nicht
ein meyde. Las faren yhr gunst / ehr vñ gut / mein schatz
ist Gottes reiche / Denn ich habe sein göttlich wort / das
die Sophisten von Louen verschmacht / mit yhrem Anti
christ verwerffen.

Darumb wacht auff yhr Christen sein / vnd last
euch nicht verführen / Von menschen leer vnd falschem
schein / darinnen sie nu studiren / Widder zu stehen dem
göttlichen wort / wenn sie die warheit haben gehört /
so grimmen sie als wolff vnd beren.

Wenn sie euch nu greiffen an / die warheit zu ver-
drucken / Seyt vnerschröcken yhn widder zu stehen / die
schriffte yhn zu entdecken / auff das mug offenbar werde /
yhr Gottes lesterung vnd sünde schwer / fur Keyser kōni-
ge vnd herren.

Kleiner straff sind sie nicht werd / so sie verhartet
bleyben / Gott scherfft sein wort gleich wie ein schwerd /
yhre böshheit zu vertreyben / Darumb wacht auff yhr
herren all / verhyndert yhr lere vnd falschen schal / das
vns Gott mit sein wort speyße.

Auff das yhr nicht mit yhrem gleich / das verdamm-
nis / die helle erbet / Sie suchen nicht der seelen gedige /
sondern

sondern yhr selbs ewig verderben. Auff das gespeyst
werd der bauch yhr Gott/darumb verdrücken sie Gots
tes gepot/vnd menschen lere erheben.

Darumb yhr lieben Christen all / last vns bitten
Gott den Herren/Das er aus der sunden gewalt / die
fürsten wolt bekeren. Vnd vns verleyhen sein göttlich
wort/das vberall müg werden gehört / den
rechten weg vns leren. .

AMEN.

Alle meine hoffnung vnd trost ynn Gott.

Alles was Gottes wort anbent.

Das nempt an/es ist hohe zeit .

W. V. 3.

Bedruckt zu Wittenberg durch
Joseph Klug.

Im Jar. M. D. XXX.

Faint, illegible text at the top of the page, possibly bleed-through from the reverse side.

Several lines of faint, illegible text in the middle section of the page.

Handwritten signature or mark.






Fi 3366

(Fäuscher)

(X2272715)



39.






B.I.G.

Farbkarte #13

Blue Cyan Green Yellow Red Magenta White 3/Color Black



Artickel der Doctorn von Louen / zu welchen / Wilhelm von Zwollen / Königs Christiernen Forirer / Christlich hat geantwort / Vnd da neben eine Christliche bekentnis gethan / dar auff er zu Meche len ym Niderlande verbrandt ist. Anno M. D. xxix. des. xx. tags Octobris.

Mit einer Vorrede Johannis Bugenhagen Pomern.

Wittenberg.
1530.